

咸淳遺事

咸淳遺事

咸淳遺事卷上

無名氏撰

景定五年

甲子

春二月辛未雨土行都大火時大元世祖

皇帝之至元元年也秋七月甲戌彗出柳芒角燭天長

十餘丈自四更從東方見日高方斂如是者月餘楊棟

謂是蚩尤旗非彗也遂遭論去國己卯丞相賈似道參

政楊棟同知葉夢鼎僉書姚希得奏事上曰彗出於柳

彰朕不德夙夜疚心惟切祇懼宰臣奏曰陛下勤於求

治有年於茲甯有闕失實臣等輔政無狀所致上貽聖

憂臣見上疏乞罷免可以上弭天災上曰正當相與輔承闕失上回天意臺臣交章言星變災異皆公田不便民間愁嘆不平之所致乞罷公田以答天意賈似道亦丐辭右相位上曰言事易任事難自古然也使公田之說不可行則卿建議之始朕已沮之矣惟其上可免朝廷造楮之費下可免浙西和糴之擾公私兼濟所以舉意命卿行之今業已成矣一歲之軍餉仰給於此若遽因人言而罷之雖可以快一時之異議如國計何卿旣任事亦當任怨禮義不愆何恤人言卿宜安心毋孤朕

倚毗之意於是羣議遂息先是都漕劉良貴浙漕吳勢卿陳堯道曹孝慶合奏限田之法自昔有之置官戶踰限田嚴歸併飛走之弊回買官田可得一千萬畝每歲則有六七百萬之入其於軍餉沛然有餘可免和糴可以杜楮弊可以餉軍可平物價可安富室一事行而五利興實爲無窮之利上然之似道遂以自己浙西萬畝爲公田倡嗣榮王繼之趙孟奎以自陳投賣故朝野無敢言者初議以官品逾限田外官買之際二百畝以下者免餘各買三分之一立價以租一百者償十八界會

四十楮不及者減價數租多則銀絹各半又多則度牒
告身准直登仕郎三千楮將仕郎千楮校尉萬楮承信
郎萬五千楮承節郎二萬楮安人四千楮孺人二千楮
於是浙西六郡各有專官平江則包恢成公策嘉興則
潘墀李補焦煥炎安吉則謝奕趙與貴王唐珪馬無演
常州則洪穰劉子庚鎮江則章昉郭夢熊江陰則楊班
黃伸並俟竣事各轉一官守臣並以主管公田繫銜其
公田每歲秋輸之官倉特與減饒二分或水旱則別議
放數其間毗陵澄江一時迎合止欲買數之多凡收六

七斗者皆作一石收租之際元額有虧則取足於田主及歸附以來元無底籍田主又將止收四五斗者抵換元賣田數以致米數不敷遂成拋荒遺害農民迄今嗟怨

冬十月忠王卽皇帝位是爲度宗詔以明年爲咸淳元年詔曰皇天眷祐下民而作之君王者改元視始而正其本朕以菲質獲承至尊罔不在初永爲嗣德之義悠未有艾益謹繼繩之謀蠲貢式以清化原施曠恩而導和氣內則收召眾正以立邦家之基外則撫循三軍以

固封疆之守期底甯於方夏用固必於成功率循舊章
靡遑他務將更端於嗣歲因改厯以紀年永惟冲人祇
適丕憲奉顯謨而纘服實同英廟之初躬達孝以盡倫
爰法壽皇之制况咸平淳熙之際皆泰和極盛之時乃
輯嘉名式新紀厯庶幾咸樂利而致天下和平之福一
風俗而延運祚長遠之休嘉與咸生共陶聖化其以明
年正月一日改爲咸淳元年赦文曰帝王統羣生實任
撫綏之寄春秋正五始况承付託之初仰惟先皇丕承
前烈纘緒十有三聖光紹甯宗享國四十一年遠繼仁

祖子民若保事帝如臨以江海之量優容羣言以雨露
之仁滲漉九有時和屢格敵難乍消日引月長久於其
道早朝晏罷適求厥甯聖躬莫殫于焦勞冲候遂愆於
節適興言菲質共侍宸廷解帶匪遑所期日間抱弓何
及詎意天摧驚聞憑几之言俾奉纘圖之重恪承懇極
勤撫多方創鉅痛深且嬛嬛而在疚投艱遺大尤懍懍
以弗勝惟天地之德好生惟祖宗以仁立國矧屬君臨
之初政式循覃霈之舊章可大赦天下云云於戲天付
有家傳在予必稽謀而疾敬德父有天下歸于子惟永

局江遺事卷一
念而弗棄基庶能慰六軍萬姓之同心于以答中國四
裔之望治尙賴忠賢碩輔文武百僚叶濟康功共扶昌
運

翌日降內批曰予惟章聖嗣統之初復秦王官爵蓋太
宗意而章聖克承之故濟王生前之官先皇已自追復
而有未復所贈官爵乃畱以遺之後人卽章聖踐阼贈
秦王太師中書令之典也所當繼志以慰永懷可追復
元贈少師保靜鎮海軍節度使仍令所屬討論墳塋之
制目下增修餘照先帝端平元年六月十一日指揮

案通

鑒宋甯宗嘉定十七年史彌遠矯詔廢皇子竑爲濟王而立沂王子貴誠卽理宗也又理宗端平元年太常少卿徐僑嘗侍講開陳友愛大義帝悟乃命復竑官爵有司檢視墓域以時致祭又降內批曰恭

稟慈訓先帝嘗欲照故太師崇獻靖王加兩鎮恩數于

太師嗣榮王治命不可違也令學士院擇日宣鎖降制

其制曰朕初紹丕圖恪遵慈訓棠棣孔懷之愛仰沐先

皇行葦內睦之仁孰加叔父撫紹熙一時之令典有憲

靖拜節之殊榮曩友則其兄恩未酬於素志今言猶在

耳事爰屬于眇躬如對咫尺顏用孚羣聽具官與芮聯暉

皇極

闕二字

總磐元王帝弟之最尊多閱理義河間宗室

之大雅獨備溫文厚敘親賢時維昭著聳民瞻之赫赫
莫重建旄訓公族之振振有華襲爵式相好矣禮亦宜
之粵于宅揆之初追感盡倫之義承而弗德望而弗至
惡乎用情敬其所尊愛其所親庶幾達孝况承治命具
有舊章是用端策涓辰揚庭渙號袞衣赤舄仍冠槐司
寶甲琫戈加崇將鉞膺組不移于泮水新麾增煥於雲
安順考邦彝三公乃兼兩鎮特優宗老累朝不過數人
併衍爰田申陪眞食敢望馭貴惟以篤親於戲稽漢制
之兼郡連城用彰殊禮慨唐宗之大衮長枕能不愴懷

式示蕃釐以綏茂渥可特授武康寧江軍節度使依前
太師判大宗正事嗣榮王加食邑一千戶實封四百戶
尊謝皇后曰皇太后宮曰慈福太后兄謝奕封郡王姪
堂直堅屋皆節度使

立全氏爲皇后后理宗母慈憲夫人姪孫全昭孫女其
制曰王位在德元所以接千歲之統后職聽內治所以
刑四方之風朕肇總乾綱儀圖坤載文王爲世子問安
嘗共至于寢門太姒嗣徽音思媚並仰承于京室全氏
冲和而淑茂懿敏而靜專

闕

圖史之遵動中珮環之節

仰惟聖父謹擇儲妃興懷慈憲之家我之所自出爰得
元良之配因不失其親禕褵粲入覲之儀衿帨盛來嬪
之禮天作之合人無間言而能謙毖自將柔恭有恪寒
溫隨甘旨之適夙夜期警戒之成漢觀錫名鍾在太孫
之愛唐宮臨藻增多慈母之歡朕丕紹帝圖敬敷明則
怡怡愉愉而奉太后茲惟卽位之初雍雍肅肅而惠宗
公端屬御家之始矧明惕于親訓仍申諭於眇躬謂子
事父婦事姑旣無違禮則男正外女正內當舉上儀加
重翟以玉笄範盤螭于金璽式遵隆旨茂建鴻名於戲

朕承長樂之顏后則餽□于東內朕奉清廟之祀后則親蠶于北郊關雎有正始之基葛覃爲節用之本順夫陰陽之義則家理侔于天地之行則物宜庸基化原永綏福履可立爲皇后仍令有司擇日備禮冊命

賈似道爲山陵使護理宗梓宮渡江殯于紹興之殯宮似道自上卽位累辭相印至是遂歸紹興私第去之後三日上遣都官牟源賁御筆宣諭促還其書曰予夜不安枕未明求衣專俟師相歸處分萬幾之事今茲三日矣所降諭旨今差牟源用致予意勉促師相速回宜諒

深衷毋事皋綏繼以似道未至復命陳昉再賁御筆宣
促其書曰師相鎮安區夏綏撫生民怡然泰和之世今
師相舍機政而歸錦里誰與予膺鎮安撫綏之任此豈
泛泛悠悠越日與時從臣猶未有的回之報更命陳昉
親行代予勉諭師相速還朝堂至意所在幸冀矜體兩
使旣至越似道猶辭不已復奉表回退相印丐祠然後
敢還上欲其回乃曲從之降內批曰賈似道援引故事
毅然去國極力勉畱累疏懇切渡江歸里其以數從臣
宣召者亦旣至再親筆由庚置往者日不下六七端殿

從臣朝列今已八遣回闕之期未聞納祿之請隨至所
賴師相力勉陳請又必以得祠爲期予亟欲師相之還
朝姑爲雅志之是徇可依前太師鎮東軍節度使魏國
公醴泉觀使兼侍讀仍奉朝請令學士院降制上又遣
近臣同福三至其第邀請及制書至越賈似道又奉表
辭太師上復不允遣使賜御筆曰師相盛烈元勳允合
維垣之顯拜高懷雅志今因宅揆而力辭陳請甚堅執
謙難奪予惟成王初政方有賴于經邦周公爲師曾何
嫌于作輔至勤累疏再徇陳辭雖重拂于予衷然愈成